

曲沃縣志卷之二十八

祥異

自洪範陳休咎世之譚祥異者或曰天或曰人夫驪
姬入而申生亡虎神成而諸侯散沃之異莫大乎是
天歟人歟不待智者能辨之不是之間而問諸雨暘
之時怕草木之榮枯不亦末乎雖然鱷徙虎渡火返
雉馴有一方之人卽有一方之天沃何獨不然故上
稽成周下迄今茲凡見於七十里之內者悉著於篇
明天之不假易也而人事亦可想也志祥異

曲沃縣志

卷之二

祥異

一

周敬王六年龍見於絳郊○元王五年澮絕於溴梁○
考王四年夏四月大雨雪○十三年冬桃杏實○威
烈王四年夏四月大雨雪

漢景帝中五年夏四月水火合於參

東漢永初六年池水皆赤如血○延光三年春三月大
風拔木○永建四年霪雨傷稼○建和二年木連理

西晉咸寧二年秋八月地震○大康元年春三月霜雹
夏四月雹○二年春三月隕霜五月雨雹○永寧元
年秋七月風雹折木傷稼○建興元年雨血

東晉太元八年夏四月太白晝見在參

後魏普泰元年冬十月金火歲土聚於觜參

東魏元象元年大旱

北齊河清二年旱虫傷稼

隋大業十三年夏六月鎮星羸而旅於參

唐武德七年旱○貞觀二十一年旱○二十三年秋八

月地震冬十一月又震○永徽元年旱蝗夏四月地

震六月又震○景雲二年春正月地震○開元十二

年旱○大曆二年水○元和十二年水害稼○長慶

曲沃縣志

卷之二

祥異

二

四年蚘蚘虫害稼○六年旱○咸通六年春正月大

風拔木冬十二月地震壞廬舍地裂泉湧泥出青色

○八年春正月地大震○乾符五年秋大雨澮汾溢

流害稼○中和元年春霜秋旱霜殺稼○光啓元年

秋大霧○二年夏晝陰積六十日○乾寧二年春三

月地震

後周顯德三年春正月有星孛於參

宋開寶五年大水○淳化二年春旱冬復大旱○至道

二年秋九月地震○天禧元年蝗蝻生○明道二年

蝗○慶曆三年冬十二月地震○熙寧七年大旱自去秋七月不雨至夏四月○九年旱○崇寧元年春正月地震○宣和六年閏三月地震○七年秋七月地震

金皇統三年秋大熱○正隆二年秋蝗○五年地震○大安元年地震○三年大旱○崇寧元年旱大饑元至元八年蝗○二十六年大雨雹○二十八年秋八月地震○大德七年秋八月地震村堡移徙地裂成渠破壞廬舍壓死人民不可勝紀○八年地震○至

曲沃縣志

卷之六

祥異

三

正七年大旱○十年大饑○十一年地震半月乃止○十九年夏五月飛蝗蔽天所落溝塹盡平大饑

明永樂十年饑○十四年饑○宣德八年夏四月旱○正統六年饑○成化十六年旱○十九年饑○二十年夏五月大旱○二十一年大饑人相食○弘治七年大旱○八年秋七月大旱○正德七年夏五月黑青見其形如犬夜則擊傷人人不敢屋居鳴鑼鼓禦之至秋乃止○嘉靖七年旱○八年夏六月大饑○九年旱○三十四年冬十二月地震○隆慶元年秋

大旱無禾○二年春二月饑○萬曆八年夏五月大
風拔木秋七月大雨雹○十三年夏旱○十四年饑
○十五年大饑○十六年夏五月大疫死者無筭至
冬乃息秋八月莠杏花○十七年夏有年○十九年
秋九月地震○二十年夏四月霜結冰六月大雨雹
○二十六年饑○三十年獲豹○三十七年秋旱無
禾冬十二月大饑○三十九年春三月大疫夏四月
大火燔民居數百間○四十年夏四月疫○四十六
年夏六月飛蝗蔽天○崇禎十三年春二月大旱汾
澮俱竭大饑人相食死者無數

曲沃縣志

卷之六

祥異

四

國朝順治五年檜樹生花○十二年蝗○康熙元年秋
八月霪雨二十日壞城垣廬舍無數○六年春正月
雷發聲雨黑水○十三年大有年○十五年大有年
○十六年檜生花○十八年秋霪雨二十五日壞城
垣廬舍無數○二十二年夏大水秋大旱池水赤○
二十三年有年○二十六年夏六月暴雨衝毀北門
上西門中西門弔橋○三十年夏大旱秋七月蝗雹
災霪雨○三十一年春大饑○三十三年秋大熟○

三十四年夏四月初六日地大震○四十二年冬甘泉湧○四十三年秋無禾冬桃杏紫荊花○四十四年夏大熟